

江文通集

冊一

四部備要

集部

上海中華書局據梁氏校

刻本校刊

桐鄉

陸費達總勘

杭縣

高時顯輯校

杭縣

吳汝霖監造

丁輔之監造

序

自建安七子而後晉世士大夫競以詞華相尚降
及六朝其風彌盛綴文之彥無乏於時而梁醴陵
侯江文通爲最著唐李延壽撰南北史與任彥升
王僧孺同傳而其論贊則曰淹實先覺加之以沉
靜昉乃舊恩以名位自畢僧孺碩學而中年遭躓
未爲不遇延壽於三人中剖別若此其傾倒於文
通者至矣文通少孤貧常慕司馬長卿梁伯臯之
爲人不事章句之學留情於文章始隨宋建平王
景素在兗州先曾繫獄上書得免繼以對策高第
景素有異志贈詩十五章以諷焉宋齊之際文誥
章奏皆出其手迨遇梁武晉秩通侯一時文章有
一無兩其製作當不下數百萬言而見於昭明選

中者寥寥無幾威鳳一羽未足以驗其五德蓋古
人之高文典冊埋沒於陳編蠹簡者多矣可勝慨
耶先曾大父司寇公網羅殘闕以表彰藝文爲己
任輒以不得見文通全集爲憾余生也晚少就家
塾間讀史傳見文通所載寄錦授筆二夢心竊豔
之長而從事四方偃蹇失學空負家聲不克自振
比年捧檄河干作宰葵邱邑爲文通故里子姓繁
衍因爲亟訪其遺文冀以闡前徽而紹先志邑紳
梁學愚賓先獲我心搜輯十餘年釐爲各體彙成
四卷而文通之集始大備不鄙棄予以全帙見示
予受而讀之霞蒸雲蔚龍跳虎臥規倣西京直與
馬卿梁鴻相伯仲挹其詞藻可以凌鑠應劉彼任
與王二子者能不爲之後乘哉考文通之生平任

性文雅不以著作在懷故其文不少概見於世向
微梁君之苦心搜羅流傳散佚幾同文獻之無徵
此昌黎所云莫爲之後雖盛而不傳也如梁君者
不重足多乎抑傳又稱文通少以文章顯及夢張
景陽截錦以與邱遲又夢郭景純採取懷中五色
筆文思頓減時人謂之才盡按邱遲辭采麗逸評
者謂其點綴暎媚似落花依草詎可與文通同日
而語史失之誣往往言不副其實非篤論也今是
集出而文通之文益大顯於天下譬如埋金蘊玉
其光氣終不得而掩而梁君苦心纘述洵爲作者
功臣余承乏於茲樂觀全豹敢輸俸入付剞劂以
壽世庶幾傳示藝林永垂文苑俾昭邑乘之光亦
以釋先曾大父好古敏求之遺憾云爾乾隆二十

三年歲次戊寅仲秋之朔崑山後學徐傳星白榆氏序

序

隋著佐郎杜公瞻編珠四卷流入天府高詹事

士奇

檢閱內庫書籍得之廢紙堆中逸其半覓之

不可得因手爲錄出後歸里照原目補成全書以傳於世東海徐大司寇云唐經籍隋藝文二志并無此書蓋凋零磨滅久矣千載後得詹事存其書何厚幸乎觀此前人著作卽簡斷篇殘猶宜脩完補綴況球琳瑯玕斑斑可攷聽其散逸可乎吾邑江醴陵集花簇錦團今幾棋布星羅可慨也昔鄉

先生王禮部

貫三

官京師其同年友韓大宗伯

葵

謂曰貴鄉江集壁尙完否刻而傳之桑梓後起之責也禮部心諾及山居延予家塾時理韓辭覓其集弗獲賫志以歿嘉定雲進士

申官

禮部分校所

得士一日過考與予談問錦索筆事屬辭如韓加
詳豫中節鉞大吏及督學使往往下檄徵求以不
獲其集爲憾蓋醴陵爲吾邑文獻之宗與前之子
莊子分道揚鑣後先輝映濱河荒邑藉以生色者
千有餘歲四方名流聞風過邑者必諮焉蓋夢筆
之奇等於夢蝶風馳藝苑人人各有二公在其意
中獨是南華紙貴不僅洛陽江集如海外三山可
望而不可卽果文章之殊科歟抑顯晦之有數乎
然江裔環其墓而居者指不勝屈莊裔之在考者
幾付於無何有之鄉荒烟蔓草僅存蒙澤之迹憑
弔二公者又不勝存歿之感焉夫江集藏於金櫃
石室世人旣不概見文選志乘所載吉光片羽楓
落吳江膾炙人口欲窺全豹託之夢想公裔江子

性若苦心搜羅僅得數奇康熙辛丑予遊京師長

安人多以江集爲問聞新安汪公士賢有雕本歸

來於繪川楊確山學誠架上得之命子曰源鈔謄

卷數雖符自序文之遺漏者尙多丙辰予館睢州

蔣郎中秦家得婁東張西銘溥百三家選集又

五年改館湯滌齋之暄處得文正公鈔本少許合

三書互參攷訂質之原目始無遺珠之歎間有魚

魯帝虎之訛謹爲校對總其成數訂爲全書殫十

年之辛勤竭一得之獨見妄爲序次補其缺略珠

聯璧合燦然奪目每一繙閱欣然獨笑敢自謂有

功前賢乎桑梓後起之責庶幾代老友踐其宿諾

耳夫人之好事誰不如我烏知奕世後不有高簷

事其人者出而箋注之使江集詳明典贍與子莊

子之書競葩鬪麗其生色荒邑不更有大焉者乎
是所望於吾邑後起之秀者乾隆戊寅正月邑後
學梁賓謹序

序

姚察梁書合傳李延壽南史合傳暨集內自序傳
參互攷訂則文通推長者之行無疑其經綸治績
可與史平原後先輝映爲吾邑光寵匪第與并世
范蔡稱伊呂瑜亮已也而詩賦散體清新倩麗上
可嗣音漢魏下開三唐又非范蔡諸公可比文采
風流超然獨秀擬之前後氣體雖殊而傳世無窮
其趨一也恨別二賦與詩文登選者固已膾炙人
口餘如海市蜃樓若隱若現藝苑託之夢想蓋唐
宋後原本旣不可購元明來屢經兵燹全書亦不
可得間有一二刻冊名山藏之窮鄉僻壤視如天
上奇書苟不及時搜羅敘次纂補幾何不雲散風
流耶吾友梁子學愚修綆汲古之士憫邑賢著作

久湮加意諮訪始得之新安汪氏再得之婁東張氏合睢陽湯文正公鈔本全豹始備爲之訂其訛謬序其次第釋其奇字叶其韵語段落節奏鉤畫圈點大率薈萃諸家之要語穿窰礙定兩可殫十年之辛勤攢翠合錦稱善本有功承學家貧乏資藏笥中者歷有年所幸遇 崑山徐老父臺南國名儒來宰是邦閱之欣賞慨付剞劂學愚子復念古人傳書精妙領會各存其人恐一己之見未克合符作者之意將前之音韵鉤畫概從汰去祇存廬山真面吾知是書出千餘年之筆花常新家傳戶誦不等于玉京鄉媛之物編次表章厥功維均崑山父臺政務不暇命允開局荒村董理其事不揣妄序巔末蟬噪虫吟敢云摛詞挾藻附青雲而

聲稱後世故忘其固陋而搦管欣然也乾隆二十四年歲次己卯二月邑後學金允高謹序

江文通集總目

第一卷

賦

第二卷

詔

教

表

章

第三卷

奏記

牋

啟

上書

書

符

論

傳

墓銘

行狀

誄

祭文

祝文

頌

讚

第四卷

騷

樂府

詩

江文通集卷之一目錄

賦

學梁王兔園賦

青苔賦

蓮花賦

丹砂可學賦

靈邱竹賦

空青賦

赤虹賦

四時賦

別賦

恨賦

去故鄉賦